

天一閣集

天一閣集卷之十九

四明范欽安卿 著

贈包白厓序

白厓先生棄官東歸偃息甬東之墟謝絕交游睥睨天壤若無足以當意者興至情屬則曳杖逍遙抵掌劇談觴行耳熱拊缶吟嘯離騷之經扣角之歌蓋三致意焉語及時事輒瞪目不荅歲時郡邑大夫過其廬不見見亦不一報謝率以爲常歲庚戌蓋六十矣友人西洲王子與先生姻也質言於范子辭以不文久之王子且屬續遺言子其終其

事而予又深辱先生知也序曰予於白厓先生之
遭而嘆直道之難行也又傷時俗云孟子曰志士
不忘在溝壑又曰不直則道不見先王之教散尚
名義以振厲風俗故士非德不程非禮不履非大
猷不陳非職守不恪上之人又張直言之旌設方
正之格以招徠之當是時教化大行遐邇同風故
特立獨行奉法守正之士有所恃而不恐乃後之
人柔和卑退遇事無可否圓融委曲以要其成斯
曰長者曰老成人反是顯辱奇禍可以立至世方
以此爲戒嗟乎俗之薄若此耶予觀先生生而狷

介動必禮闕平居論天下事義氣勃發抑抃伸屈
千夫莫奪鄉之人知有先生矣或頗訝之先生不
爲動已而倅蘇州時中貴人怙勢脔削先生廉其
實將上書言事語洩被構賴

天子仁聖量改無爲州隨移成都轉漳州所在申法
飭度滌垢剔蠹巨細畢興民怡吏肅然烝向治會
與上官議不合遂拂衣去矣夫以先生官不過五
品任不滿數年其所施厝已章章若是使稍自歛
遜秉機赴會且都大官享重祿蒙顯舉不難也而
竟引身遠逝志不獲究今垂老矣顧使齷齪者藉

口而特立獨行奉法脩職之士慘焉畏沮予故曰
直道之難行也俗之薄亦甚矣嗟乎人之所違天
之所相也時之所嗇道之所裕也故天定則能勝
人道在則可俟時夫虞卿馬遷楊雄王通世之所
謂賢人君子也方其窮居林丘沉迷下僚著書自
見若所謂春秋史記太玄元經者後之人視之不
啻和王使遇其時必不能發憤自見如是炳顯此
天人物理之介可以推見者也先生方脩古人之
業將崇王道黜伯畧翼聖經斥異端闡微發幽記
紀名實作一家之言藏之名山以詔人人當不讓

前數子矣是道不伸於恒人而伸於知己不行於一時而行於後世不取必於人而取必於天高名永壽後天不朽又何必都大官享重祿蒙顯譽斯爲快也觀此則先生之不遇殆天所相也持此以質先生儻以予言爲然乎

送曾封君東歸序

山以東最名多魁畧倂儻之士偃息丘樊傲睨侯王禮羅所不能致崇祿所不可浼蓋埒名於逋放而託志於箕穎雖風氣渾龐使然亦周孔教化之漸其來寔遠在世主敦訪而崇獎之若勿菴梁君

二山宿君所稱南山魯先生斯其人哉二君之言
曰予輦皆山東人往來齊魯間聞先生名最高少
時慷慨踔厲期以功名自樹俛仰今古蓋慕終軍
汲直之風久之乃抗言曰聖人之道一龍一蛇吾
即不能奮翅騁足上應五百之運亮工熙載致世
盛明亦安能輕身媒進浮湛取容微不可必致之
勲爲鷗夷子皮所笑居嘗杜門謝客琴史自娛酒
數行微醺雅歌長嘯意興所屬不遠數百里躡泰
岱循徂徠欲起六逸而與之將遂上莊生釣臺訪
黃石汎范蠡湖濯纓滄浪觴太白樓吊魯靈光徘徊

徊孔林顏巷之間而返望者疑爲流連光景而不
知先生所存充然有真樂也先生既慎茲好脩而
以其學庭授內山君名位日起出守四明四明濱
東南海世所稱蓬萊方丈僊人遨遊先生則又瞿
然喜曰夫所稱達人者游方之外吾上誠偉麗然
邇涉不如遠浮汎覽不如窮探司馬子長何如人
哉乃扁舟南下溯長淮濟大江登句曲天目諸山
望金陵俯視震澤按行吳越故宮出錢唐觀子胥
怒濤上會稽窺禹穴天台鴈宕羅列几席搜竒獵
勝曾不知神力之倦就郡邸而暫憩焉先生父子

相對甚懽郡中吏民罕能睹面內山君質以郡事
先生張目不荅內山君彌加祗慎蓋心喻而力赴
之斯余輩之所親睹也嗟乎世之人嗜浮華而畧
實履急外馳以昧遠圖由曾先生觀之儼然超於
塵壒之表名場利府愛河慾海皆不足以嬰心信
齊魯之多賢而聖人之教未衰也先生以內山君
貴業已膺封今且東歸矣

聖天子下詔訪求俊逸褒然稱首山東者將不在茲
乎吾固爲先生引領矣

贈奉化楊大尹序

漢史有言守令民之師帥所使承流而宣化予
三致意焉至歲遣使巡行天下問民疾苦舉刺如
所條聞其風厲而維持之者又何委備而勤篤也
嗟乎漢治於是近古矣夫守令皆子民而令尤爲
親且專上焉者撫巡省府體統崇嚴則尊而不親
下焉者丞尉簿領分理庶務則散而不專令處其
間而上下交承固宜奉法脩職仰體德意與民休
息可也迨世下趨吏治廢闕遂至背公樹私貪戾
恣睢以民財爲魚肉民命爲草菅安然行之而靡
所收卹使人可避而不可近棄心志而任耳目憚

振勵而樂因循政體下移勢如亂絲卒之紀綱頽
廢蠹垢如山使人可玩而不可懾不可近則失其
所以親不可懾則失其所以專豈風移俗靡難於
轉旋哉夫亦勸厲之道未之彰耶奉化宸山帶海
鮮有蓋藏頑梗沿襲夙稱巖邑蓋自倭奴發難歲
侵內地兵需百出仰給縣官上之所以督責者甚
亟民間供輸竭盡錙銖而又適罹大侵閭井蕭條
衆心愁嘆皇皇焉不免於朝夕下之所以屬望者
甚殷若是而欲全其親且尊又非前儻矣使非有
廉介浚潔之守子惠則恒之仁明達敏給之才老

成持重之識胡能善於其職而達於上下邪予於是而嘆吾楊侯之賢方其莅政茲土惻瘼在身即持綱維一法令簡繇賦慎追逮裁供費勞來拊循殫盡心力諸所不便者一切報罷務在樽節愛養與之更生由是吏習其政民安其業盜賊衰止戶口滋息喁喁向化庶幾有古循良之風都御史豐城鄔公奉命按部廉其實爰檄所司獎勞斯亦漢代風厲之意楊侯於是爲榮奕矣雖然金之精於百鍊者其氣完也驥之輕於千里者其神裕也故士以歷試而效宦以持久而成楊侯起家俊造被

服恂恂若儒生性敦廉仁而尤綽有才識其所注
措要非俗吏之所能測識也循是以往德問彌宣
聖天子惠養元元加意守令將脩故事訪茂異增秩
賜金璽書褒美徵備公卿以明得意他日吳越之
間膺

召命者必侯也則斯舉者其殆爲之權輿矣乎尚執
筆以俟

贈盧都督序

東南自倭警興羽書旁午

王上銳志撻伐夙夜咨諏於將士中思得異才畀節

鉞以佐百姓之急意甚勤厚也海內之士颺起雲
蒸爭相洗濯期於表樹人自以爲韓白家自以爲
衛霍然而許功程能靡效尺寸不且負譴詬以去
斯其人豈皆巽矣猥庸虛談浮譽無益於短長之
數邪抑乘期邁會將亦有所須也以吾觀於北山
盧君於是伏嘆

皇上知人之明而君力於任事焉君本將種倅儻奇
偉流輩咸所避讓會倭事起積功官至都指揮禦
寇閩海上復大捷言官以私憾論主將遂及君乃
就閩候讞縉紳固已惋惜予習聞前事值承乏長

臬往會君掀髯攘袂論古今將帥上下攻取成敗
南北制禦經畧諸機宜斬斬咸中要會如矢之應
括珠之走盤駿馬之下長坂余嘆曰世有如盧君
而可使之竟掩抑耶深惟

聖天子昭雪而敦使之斯緩急是賴事遂釋屢樹奇
功乃晉叅將晉副總兵晉都督充總兵官鎮守吾
寧金書王帶蓋侈焉崇鉅矣茲又以擊象山奉化
賊諸功增俸一等君聞之謙退若弗勝思以鞠瘁
報

皇上之遇斤斤益虔嗟乎昔人有言知人未易人未

易知賢如漢文而失之馮唐哲如光武而失之馬援使當其時讒間得行吾恐肘腋之近肺腑之親且將按劍起視禍罹旋踵欲以從容闔外展布才猷殆不可觀而况都巍秩蒙上賞委心推轂彌久彌專若今之所值豈不至難至難者耶余故伏嘆我

皇上知人之明也士亦何嘗不願繫蠻夷蹙北虜勒燕然標銅柱樹勲伐於當時流聲光於百世然先時而幾不審時至而赴不力閃伏詭闕巧於自營攘功竊勞圖在掩覆凡以任事之不力耳觀君聞

警橫槊慷慨直前摧堅陣破巨艦身經百戰千人
自廢而無縮容威聲四播賊人望見旗幟及聞部
領所在即懼伏遠遁海上自用兵來垂二十年臻
於晏謐若今日者君之功於是爲卓矣旦夕入掌
樞府侍

禁直如金日磾王德用故事此吏民所爲稱慶而猶
慮其亟去也余于是因夷平而服君之功因君功
而頌

皇上之明何君愈以職事荷君覆露委贈言於余其
意顧不在茲耶其意顧不在茲耶

壽黃公七十序

濟川黃公某之大父壻也往來甚昵繼遊公第致
齊先生之門又得締姻猶子資穆耳淪目濡知公
行事甚習茲春秋七十矣友人芝山楊君宜山錢
君白坡董君輩咸以耆碩與公雅厚乃擴事繪圖
合辭稱慶某得而延覽焉曰德必獲福壽不忘頌
公之賢蓋非更僕可盡矣獨諸友也哉吾見公起
家今尹所在有聲慶延諸子乃咸顯庸長肅官鴻
臚仲恭官水部季意官少尹若謝家之樹實氏之
桂林立王暎咸均玉雲稱祝無間遐邇斯可以觀公

之賢矣公族無少長曰微公吾寡者曷充弱者曷
植業士者曷程女失所者曷歸無能爲效願公壽
考維祺廼相率羅拜聲溢庭祀斯又可以見公之
賢矣里黨藉舉火者若而人凶年受糜粥之施者
若而人孤兒孺子獲焚券者若而人歡忻爭造爰
祝爰謝斯又可以見公之賢矣鄉之名士大夫曳
王者衣緋者垂紳綰綬者鵬冠而養高泥蟠而待
時者躡履分袂稱辭喻志若所謂香山之會洛社
之期焉斯又可以觀公之賢矣郡國之大夫邑之
侯將校之領博士之員朱軒華轂后先翕習斯又

可以見公之賢矣吾故曰公之頌不特諸友已也夫福不可以倖圖頌不可以強獲非以德不可以襲取乎故良于家者不必良于族諧于里者不必諧于鄉名於郡國者不必名於朝凡以德有巨細而逮有廣隘也即公所見於家吾得其理焉於族吾得其厚焉於里吾得其惠焉於鄉吾得其睦焉於郡吾得其致焉於朝吾得其問焉合而言之所謂賢也賢則戩穀之貽百福之來壽且先之矣天合人助將踰耄耄躋期頤迨乎無筭斯非所謂德必獲福耶宜乎人之頌之衆也若夫榮啓期被裘

行歌樂善不倦衛武公九十猶不忘淇澳之警此
則德隨年邵名不隳成保泰定盈久彌專篤者也
賢而如公當沛然矣至昌大其德申福無疆是在
諸子詩曰庶幾夙夜以永終譽公之謂矣又曰孝
子不匱永錫爾類諸子有焉

送曾郡侯遷陝苑馬少卿序

世稱三代而下漢治頗爲近古迹所行事尚本實
者畧聲華先教化則後法理用以褒顯俊異風厲
海內所稱二千石皆悛悛醇篤君子也若辨博開
敏之士所居非無赫赫名槩不得進而例論斯其

故何哉上之於民也亟欲守長安利而惠養之也
其政務在奉條章勸課農桑設師長保伍率先孝
弟順流不擾與民馴狎非故崇炫燿駭異之觀攻
䟽剔鋤擊之術也當是之時元元樂業號稱乂安
漢治於是庶幾矣 明興鑒古敦化茂選良吏以
寧民萌佐太平品校治行大都上者入爲九卿次
亦增秩賜璽書褒美如漢故事用是守長矜奮以
循良著聞者後先相望蓋不止况楊張段諸賢而
已若吾郡曾公其所施存殆亦諸賢之流亞哉任
且三年乃晉爲陝西苑馬寺少卿說者謂苑馬散

秩不當以屬公地臨西陲數千里外公亦不宜遠行予曰不然吾聞古者爲官擇人不聞以人擇官桑弧蓬矢固丈夫生而所有事也

聖天子龍飛御寓當琴瑟不張之後銳精督厲吏皆丞丞趨於辦治長厚廉讓之風顧遜於曩時

上意蓋厭薄之躬脩玄嘿期與天下臻於康謐奉以周旋責在二千石吾郡亦既有成緒矣寺之苑監散在岐函涇寧間唐張萬歲緣是育馬至七十餘萬者也乃今公私交病畜牧簡濶狂虜狶突不能應卒士騰驤之用識者嘗爲扼腕拊循滋息要非

曾公不可挈以畀之顧不慎且重哉公起進士爲
工曹聲聞甚著出守吾郡政如一日試探其際澹
泊浚潔則公綽之度強立不返則趙張之守于諒
寬博則潁川南陽之風執是以往于何不濟而醕
篤無機事則又公之所以自命也詩稱衛文塞淵
騅牡三千魯僖思無邪駟牧至十六種焉彼其心
誠孚於物類故也吾固謂公之賢足以勝此若夫
計要散校遠邇流俗以爲失意如市道然非惟博
主上簡寄之指抑且不知公矣公當行郡人羅送於
郊屬予爲言遂以所聞書諸前旌爲祖道贈云

送張別駕序

滄江張君之判吾郡也歲始迨暮且十九在外間
所措設固琦偉英特之觀士民方烝烝嚮治會
主上銳志中興思以嘉惠元元大計諸藩群吏之治
下所司考核以聞於是浙江藩臬郡邑論刺有差
而張君顧在論中衆聞之且疑且駭會張君至自
京師亟欲去邑令賈君劉君何君林君輩過而問
故曰某輩幸以職事備末屬方奉令承教之不暇
何遽稱去爲也郡中故多流言即不妄亦當有能
憐才轅且須臾毋西此亦士民意也張君正色而

語曰諸君以誼好慰留誠深念也獨不聞汎海者
乎當其挾重貲駕危檣奔驚於濤泐浩演之間萬
里一壑天日並馳蛟龍之所出沒風颶之所簸蕩
又不幸而觸砵厓遇寇盜即使壯夫鮮不骨驚肉
怖遜避無所其不臭厥載殞厥軀者幾希幸而達
岸猶有惕心此無他牟利故也今夫世塗猶海也
宦猶舟也才藝猶貲也乃以寵利之故恣情游衍
危機禍羅易與遘會將恐有蹇駑騁而櫪驥因蛟
兎死而走狗烹欲攬東門之遊飫五鼎之俎其可
得哉夫以百年有盡之身而冒險絕之塗微不可

必得之利斯不待智者先幾而辨奉身欲退也吾
緣是謝去方以爲快家故吳會頗稱奧區南矚江
海北臨五湖而洞庭堯峯諸山羅列几席騷人墨
客爭暉競爽吾將携魯望之茶竈汎子皮之舟往
來其間歌西塞鰕魚之章天地爲我蘧廬日月爲
我弄丸麋鹿之與遊而龍蛇之與蟄傲睨一世不
知老之將至斯亦生平之厚願也冥鴻翩翩誰復
能繫諸君乃欲留我乎余聞之曰山林之士往而
不返朝廷之士入而不出斯各有所執也然君子
終不以此易彼權衡酌於中而善敗決於外固有

輕萬鍾而弗顧視軒綏若敝屣考由逸民傳所紀
豈非萬世之鏡哉若張君者殆進於是矣於是張
君遂行賈君輦相率祖於西亭乃別

贈總督浙東遊兵艾君序

浙以東倭奴出沒而定海實當其衝故事設都指
揮以備倭名世平俗玩寢爲冗數比年倭奴內犯
所在戒嚴時議增置水陸諸兵以司控擊乃改爲
遊兵都指揮仍駐定海松海金盤昌國臨觀及定
海五總咸聽節制臂連顧指屹然爲一重鎮意蓋
宏遠矣第任者徃徃失職於是巡撫都御史趙公

巡按御史黃公廉知艾君才疏薦晉今官職雖如
舊而寄畀加嚴重矣當是時艾君方協總寧波團
操陸兵無理海道中軍即其前後督戰崎頭韭山
太倉僊居馬蹟舟山裘村諸路水陸大小二十七
捷計鹹者二百三十二俘者一百九奪回被擄者
二十七獲舟十器五百有奇院道交旌

上聞錫銀幣者再聲奕奕兩浙間既得報士校莫不
色喜而又惜君之行有曰艾君家故將種結髮與
倭奴戰蓋十有七年協總團操亦且八年即其勞
勩上當爲總戎下亦不失爲叅遊今僅僅若是後

來者固居其上謂足以酬之乎余曰不然器鉅者
無速售積厚者無薄發夫湛盧純鈞天下之利劍
也非久鍊則必不能陸剗虎豹水斷蛟螭豫章天
下之巨材也非久蓄則必不能昂霄蔽日效清廟
明堂之用惟士亦然沖晦所以養望敦篤所以致
遠行且陟華履要顧何從而疑之語者曰有是哉
然職亦難率前內今外陸兵三千人水兵僅可三
之一責任雖殷事權固輕五總皆以都指揮行事
相顧頗孰得而節制之艾君亦且柰何余曰是所
謂計細節而昧大躰也志士不擇地而安貞臣不

易慮而動故能翼助社稷顯有令聞夫既世享祿
秩祔被叙用則夫殫心殫力矢以身殉平居則折
衝尊俎應敵則摧陷堅陣將築京觀勒鼎常以報
曠違之遇固艾君素所蘊抱也若夫節制之典止
論事任而不計品秩團營諸邊法較然在艾君將
共命行事諸總總所推讓安知不率屬聽令共樹
廓清之勲以彰統御之善哉夫若是也何有語者
乃避席而作曰鄙人惜不習事乃今知

聖上之所以待艾君與艾君之所以自待矣敢不拜
嘉於是徐子一鰥等屬與聯事以贈文請而王君

承恩又代厥職次第勞勩爲甚詳予嘗獲好於君
故不辭而爲之序

送雷郡侯序

余嘗陟武夷諸峯徙倚四顧灝氣沖融琳宮璇宇
隱見林谷而廩爐曰樵諸物橫亘天際可望而莫
之即放歌鼓枻沿遡九曲琪樹森映榮光上下世
所稱道山桃源當不是踰蓋天府之深艷而神僊
之窟宅也退而延覽莽蒼之壚煙火相望桑麻蔽
野乃有丈人逋客抱犢耦耕土鼓山謳舉酒相勞
不復知有市朝事庶幾龐德公徐孺子之風焉已

而訪蔡元定之里式胡康侯劉子羽之廬而吊朱
元晦於考亭之上讀其書想見其爲人曰道其在
是乎上紹洙泗之統下以闡明絕學九原可作吾
將與遊徘徊者久之即不能遽遇其人獲與其流
亞者交幸矣歲癸亥余方偃息西野會郡守潤溪
雷侯至自武夷余入其門見其恭謹靖飭登其堂
見其沖和溫粹如玉離璞金發錮圭稜不露而尺
度整截及觀其政煦若慈母哲若神君斷若漢廷
老吏方期月于茲五邑之人交相稱慶謂瘡痍可
起休養有期而侯顧坐飛語遂拂衣行矣衆留之

弗得以告於屬邑今長留之亦弗得至有涕泣下
者侯何以釋吾人哉豈欲入山握真詮葆玄牝練
五氣除三尸遨遊諸僊之間求不死之靈藥與天
地游乎將睥睨今古蟬脫樊垢枕流漱石觀雲狎
鳥與田夫野老詠歌於康衢之上天子不得臣諸
侯不得友乎抑憫俗學之紛披闢正道之榛塞獨
抱遺經究觀終始撰一家之言以俟來哲俾諸賢
遺緒藉以不墜乎侯當有所審擇矣則夫道之興
廢命也遇之行止天也去就進退有義存也吾復
何心營營與世人較是非哉侯之沉抱可以想見

第吾郡人慕義懷德方深衮衣遄歸之望

聖天子脩黃虞之業志厲明揚必將勉從吾人簡書
臨門將席不暇暖侯能終焉丘壑乎此亦屬邑令
長賈君輦意也會以贈言屬余竊擬如此嗟乎謀
朝則否謀野則獲世之君子其無以野棄余哉

贈劉憲副晉大叅序

夫樹鴻龐之勩者富倣儻之才繫綏服之寄者擅
崇鉅之望太阿入手叱咤風生虎豹在山藜藿不
採在物猶然而况人乎故吉甫薄伐王國以定子
儀免胄回紇羅拜功不勞而成刃不交而服斯遵

何道哉神運無方而休問夙著故也海上自倭警
以來士大夫觸目激衷釋俎豆而秉盾鉞畧化誨
而急攘却智者効謀勇者畢力將使醜夷蕩除疆
場康謐其志慮非不毅然恢曠也然鴟張狼噬破
城掠野南起閩廣北達淮徐數千里之間迄無寧
歲

主上至屋霄肝拊髀思賢未聞建九伐之勲而收七
縱之心者才有所未卓望有所未宏也若吾寧東
濱於海當諸寇衝巡視憲副定議專駐以資制馭
歲壬戌會任者以失職去

上命平川劉公來司厥事振廢舉墜誠斬焉一新矣
先時逋賊徐明山輩引麻葉諸酋爲攜李惠公以
僉事提兵殲滅無遺積爲京觀聲振海徼已而晉
布政司叅議殫力撫綏民有寧宇至是倭牒者知
爲公相戒不敢內犯毛烈者故叛賊王直義子也
時議索捕甚急一日舟爲風薄至境上遠近戒嚴
公督兵酣戰烈赴水死俘其孥屬諸官倭聞益用
避遁吾寧獲有晏謚者三年士民惴惴惟恐公亟
去然積有資伐

至
上稍遷爲布政司叅政蓋俯循衆心欲以其先綏

寧者綏寧之將伏鉞開府界以關外專制之寄循
是士民又欣喜喜色相告曰吾幸徼光惠庶幾可
永息肩視諸吉甫子儀可相頡頏斯非由才卓望
宏爾邪雖然力治者安不忘危審幾者圖大於細
子文以告新尹定遠乃屬代者措慮深長而用意
忠厚遐躅令軌可舉而循也公效忠昌時軫念元
元康定安和之策攻畧戰守之宜開闔伸縮應時
化裁必已朗照曲中其能默默不爲後賢規勗乎
此庶民跂足之望走與士大夫頌佐下風也公尚
念之哉

送賈大尹遷度支序

吏治至漢代以循良著稱意必有卓絕閭閻之才
希曠竒詭之務足以驚炫觀聽誇示後世乃讀其
傳考其行事大都不越二端起顏仆者尚精明急
休養者崇長厚與時相禪開闔無端蓋天以舒慘
布其氣地以剛柔品其質人以寬猛準其程如六
律之調五味之和祇以相濟而非相厲也乃若廉
鮮不遵是軌矣自吏道之衰也以浮飾爲善政以
要結爲能名嚆黷玩縱視若故常至邇年極矣

主上軫念群黎督察之詔無歲不下所在守令頗思
淬奮斯亦漢代之意乎惟是吾鄆隣比海舉荐罹
倭警重以任非其人貼於危亡莫之省憂奸佞之
徒且營窟其間規爲便利斯豈盛世之所宜有哉
歲壬戌近臯賈君以贍才自涑水移吾邑至即刻
除弊垢自庭內始滑胥黠吏惴惴不敢出一語問
井之豪亦望風退遁百廢具興燦然可紀蓋當墜
廢之後其道不得不嚴也已乃問疾苦招流亡弛
鞭朴緩征科多方體量務與民休息意念固恂恂
長厚矣居嘗食糲服敝一錢不私薪俸自常額外

却其餘羨人尤以爲難訟至必審諦情法無或以
他故上下其手旦起即視事無巨細艱易咸綜理
有緒至晚乃輟次日復如之用是獄無停囚庭無
滯牒有可佐民之急者以身當之如增闢東岡磧
者多此類是皆畧要結之末懲浮飾之過廉平勤
敏見於躬行故其初也民疑而未信畏而未親而
其中也躍然而喜帖然而服戀戀然若不可一日
舍其視漢代循良蓋不多讓今有戶曹之轉宜矣
或曰如子言即列臺諫以備耳目之司當有餘裕
何若是斬乎曰量能而授官者政之經也審時而

擇人者法之變也天下財賦領於戶曹屬者經費日苦不給緩之無以濟國而亟之乃以厲民調劑伸縮

廷議將欲其安利吾鄆者安利天下也何可以常泥之語曰行百里者半九十是在賈君邇其志行固永懷遠圖矣邑中士大夫以予與賈君有一日之雅知且甚深徵予文以爲君行於是乎書

壽太僕卿史公七十序

玉陽史公自輟春坊務南歸也栖遲林丘而名播縉紳士大夫談盛德綜奇行者無間識不識皆屬

公嘉靖甲子於是年七十矣士大夫則又相率稱詩稿文爲壽吾鄉蓀洲秦公與公交好甚篤謂某釋褐從公後知且深授簡俾言焉曰嘗鼎臠者易飫深溟渤者難量子將何辭以壽公曰君子以二儀爲度萬物爲體得志則康濟天下不得志則覆露一鄉公家故豐殖周恤筮乏無虛日某歲饑當賑捐粟三千石助諸官遂墾西淹田六百畝歲入貯以備賑周中丞檄溧水溧陽七邑設義倉公即發金各五百兩爲糴本姑蘇治某橋堤費鉅萬以匱告即助其半淹中建嘉義書院延五經師教邑

人子弟取已田三百畝爲贍貧資四方彥士來游
者無不人人滿其意歸諸若此類蓋視人猶已而
視已有猶人之有其量宏其志毅其施宏博而無
闕是宜壽親恩如天曷共子職較其大者立身揚
名公少竒穎事父光祿公及母太夫人曲盡孝養
迨其卒哀毀踰禮既免喪不事家人產業折節讀
書讀稍倦即厲聲曰某徼先大夫之靈兩世一身
寄於不肖迺今齷齪伍村儂市兒曠沒終身俾昌
大之緒墜於予乎神奮百倍卒用是舉進士高等
授禮曹更更曹復更春坊皆有休問海內人士靡

不服公之能官而稱光祿君與太夫人之善教是
宜壽古人畎畝義不忘君故進則徇身退不牟利
自倭奴發難徐海等乘勝構合掠蘇松間兵食交
匱上至厯膏肝公捐貲募兵五千率爲先驅復
發粟萬石金千鎰餉軍蘇松底寧遇

萬歲節必齋戒祠禱歲以爲常事聞

上晉公尚寶卿再晉太僕卿官其子爲錦衣衛百戶
勤誠恭慎可表天日是宜壽夫機忘則天性湛神
守則太和流公屏却紛垢結廬於張公洞玉女潭
日延道侶講養生之術冲馬若虛盜馬若無不足

熙焉若忘人但覺其精華煥發步履趨捷以爲疾
攝之助而不知中之所存超然物表莫可羈絆是
宜壽其聞之曰壽固有道也善頌者必稽其素廣
名者必錫諸類即如公言於鄉吾得其仁焉於親
吾得其孝焉於君吾得其忠焉於世吾得其順焉
四者君子之所以成身而範物也成身則其術不
頗範物則其施不匱以是而傳播海內焉則居鄉
者師其仁承親者師其孝事君者師其忠應世者
師其順若射之有鵠望而神赴歸而心暢交相儆
切期於無負莫不誦王陽公之名於無窮斯公之

壽壽於道矣乃若神篤之祐后天不老子孫綿陔
簪組相禪則壽之餘事也特是以壽公可乎秦公
曰然遂書之以往

天一閣集卷之十九

天一閣集卷之二十

四明范安卿著

壽李君八十序

余少時聞老子曰夫惟無以生為者賢於貴生心
竊疑之以為燭燭於風雪消於晷不能延斯須而
豫章之大十圍也必臨絕澗飽霧雨斯備明堂清
廟之用即如而言身嬰百物聽其自如則
餐於無悔任攘辱而晏如也不已舛乎
入閭里習見長老皆景泰天順時人龐
比踵接大都敦慈忠厚恂恂退讓

事於炫暴迨正德中祀以來長老淪謝淳風散佚
民間倡為澆競以機智相高馳騫聲利轉相薰染
以為當然無復曩時之遺其人亦鮮長年如前所
睹然後悟渾沌之已鑿而繕性之宜務也老氏之
言於是驗矣以吾觀於郁軒公者斯其人哉公家
世將樂在閩萬山中靈秀攸鍾少即竒穎研精六
藝楚楚出人士前既失怙事母備盡孝敬廬墓三
年人鮮睹面聞於巡察督學諸君荐加褒禮於是
遠近皆曰李孝子李孝子云坐數竒不偶迴翔黌
校若不能以一日居會 詔許高年恬退者聽即

謝去其時年蓋五十所也即不能雲蒸雷奮應三五之運上之黼黻

皇猷左右論思下之宣力康濟蒼赤以彼聲聞亦當少俟須臾以應孝廉之徵顧乃奉身而退如獲重寶其雅致豈在元亮龜蒙下哉居嘗葛巾杖屨嘯傲林邱世俗所稱機械之術紛華之習一切報謝長嗣某尹奉化歲未迄暮亦既以治行聞矣公視若歐然時嘗致書勵以奉法率職無負昌時與古棄鮓詰獄者相輝映斯其淳朴愿確之心簡靜敦篤之行固有以頤養性靈保合太和者矣今歲槐

八月公壽八十而猶神慮精爽行步起居如壯人
與配蕭孺人並享遐社人或意其天稟獨厚或資
脩煉而不知充養有素誠先朝之遺老歸然靈光
藉以表儀斯世非偶然也獨怪世人不務屏絕邪
念從事刀圭期於長年遞相慕効措慮彌勤得効
彌遠其視公為何如耶竊念前古風厲世教敦賢
尚齒朝有乞言之老野有洗耳之叟聲跡交臻以
彰至治其時壽上者百二十為率下亦不失為耄
耄人主時勤延訪故爰立板築尚父起自漁
釣其他所稱優異崇養之典至委備矣漢稱近古

養老之詔歲嘗舉行故商皓翼儲壺闕疏寃雖已
遠遜於古然三老五更明帝躬爲敦化猶得存年
之遺延至後葉風節競勵達人畸士甘心鼎鑊奸
雄側目而不敢動斯亦足明遺老之有裨於人國
也然則郁軒公之所係不已重乎乃若奉揚義訓
期於崇顯昌大引於無疆俾他日曰是父是子斯
在兩峯矣於是奉邑父老曰是可謂知郁軒公者
請書以爲壽

壽父枯柯太令人九十序

今年父姑柯太令人壽九十歲矣六月二日寔懸

悅之辰於是鄉中士大夫暨親黨稱賀踵相接車
騎溢里門斯光光焉盛也某曰予於大令人之壽
有深思焉又有深慰焉先大父司訓公配大母徐
太令人生我姑暨我父繕部公歸濟川公姑黃宜
人叔父西塘訥菴兩公大父方績學十九在外值
族侮姑與我父護持大母父之大母僊逝姑年十
九乃歸柯我父年十六朝夕作勞奉大父恤諸弟
妹已乃事繼大母嚴太令人友叔父西隅公皆與
姑指合姑歲時歸寧滿堂雍雍懽懽慶靡有間也乃
今我父及叔父相繼捐賔客欲如曩時聚晤不

可得已故曰有深思焉我父既逝某嘗過太令人
所及太令人來視起居皆有度稱述往昔纒纒不
倦大都皆孝敬儉勤諸務宣暢意旨勗戒後來聞
之者咸感動顏面與庭範相發明斯見我姑猶見
我父也姑中葉家殖稍替我父居嘗深念曰何由
振柯氏之昌乃今長子棟雖積學不售教其子茂
夏竟以易膺甲子鄉薦季子木克家迨諸孫曾蘭
玉森立當此令旦羅拜堂下以次上壽行將雲興
飈奮俾先世主事公之祚獲用昌大而大令人且
含飴順適諸福駢集要大非曩日倫矣我父有知

亦當含笑斯又見我姑猶見我父也故曰又有深
慰焉其於是隨西隅公後率諸子姓上壽觴在列
者二十餘人西隅公乃曰壽者蓋天施而人成之
也夫醇化渾涵氣之胚也元和盛流治之暢也休
禎時奏瑞之符也端靖肅謚葆之周也以斯受齡
鮮弗永矣天啓

皇明遠紹黃虞精靈磅礴蓋當豐龐隆亨之會而又
主上乂道化成六合同春往年壽星南指應在吳越
之間人當久生即如前所陳太令人率履敷訓儷
古姬姜葆之良有素矣綿綿存存引於不替且將

與王母麻姑異世同稱由今視之不尤有深慶乎
某乃起而拜手曰福有由臻頌不蹈誣某於是又
知有深慶矣於是西隅公歌曰樂只君子福履成
之諸子姓歌曰如山如阜如岡如陵如川之方至
以莫不增某歌曰萬有千歲眉壽無害退而次第
其言于篇俾鄉之稱壽者得以覽觀效法焉

贈吳憲副太恒之山東序

吳公守吾寧之三年將報政會山東憲副缺
上遂以屬公蓋列鎮曹璞云范子聞之曰嗟乎公於
是肩崇且鉅矣天下之向背視京圻京圻之安危

視山東而曹濮者又山東所視以爲理亂也辟之
審射必括而駕轅以轂神動響赴誰能指之乎
國家定鼎燕薊囊括山川三面距胡一面以臨中原
控海內殆若建瓴重以

列聖嗣興世擅神武故有積稔嘻嘻而易慮俄頃令
脩於堂陛而風行於萬里之外所稱狂夷黠寇逆
藩悍將稍一蠢動應時殲滅斯蓋伐其邪謀而制
諸死命非一日矣故曰天下之向背視京圻也北
起臨德達於濟沛皆山東域內地無崇山大川之
限遂谷脩塹之險而運道正直其中歲漕以四百

萬鱗次櫛比坐間望水稱辛楚矣脫不幸而有萑
苻之警扼吭拊背非吾得專吾恐川坻懸隔咫尺
千里六軍萬姓懸命待哺朔易之間未能高枕而
卧矣故曰京圻之安危視山東也山東故習格鬪
稱易動而又地瘠鮮積聚歲逋相禪徭作並苦間
值水旱流亡載道而強者且尋干戈幸須臾無死
矣此其大較而曹濮更號多事緣與豐碭商亳相
犬齒固川陸之輿區而戎馬之走集也曩歲羅女
師詔之變震動齊魯亦足明已又黃河西注捍纔
一隄由下窺上較若金甌歲日築塞疏濬之費民

大稱困所司率檄郡集丁夫歛繒錢以相其役功未及奏而他所又以決告矣斯曹濮詎有脫駕之期即山東能息肩乎故曰曹濮者又山東所視以爲理亂也夫柄事者內填撫百姓外以消弭諸患其要在究觀天人之原按求今昔之畧蠲去煩苛選任良吏勞來長養與民休息遂其廬井室家之樂而作其親上附長之心將緩急惟吾所須斯爲善治

主上睠焉東顧挈以畀公夫亦以公之善治吾寧也公性慈仁屬念時艱至即問民間疾苦及政所便

不便狀而興罷之犁然當於衆心即以盜與水論
吾鄉田本下下率藉水滋溉故事四列硯堰諸財
利者輒盜決民並苦之公親秉封鑰時蓄洩所入
穀視昔頃倍地故有偷兒而謝澆者稱窟穴假妖
祠爲神曩莫或詰即詰亦不力公下令亟撤祠僂
其最不逞者餘令緣南畝無復恣睢斯已烈烈若
是殆冀遂召信臣之流亞乎語曰小占大遠視近
由今所論曹濮之患蓋莫急於盜與水矣公以其
治寧者治曹濮廓而大之涵乎無間恢恢乎游刃
也又况奉

天子爾書行事得從便宜乎吾固沾沾爲曹濮喜且
爲山東喜爲京圻喜爲天下喜也可前睹已公將
行廣文周君紹秘攝吾邑事問言於范子因具論
之周君曰予乃知吳公之有崇且鉅也非子莫聞
此言雖然

主上寤寐賢豪佐理中興行且召公矣

送徐憲副之廣東序

國家衆建外僚以牧寧永黎翼輔

夫運蓋親而尊莫如守要而肅莫如憲斯較然可睹
矣郡大夫徐君蒞寧三年晉廣東按察司副使

行乃邑令王君儼然某方視邑屢從境中長老質事語及君酒焉而喜繼愴焉而疑已又愴焉而悵悠悠殆有深思焉將何謂乎某曰走方抱疴謝客門外之事非所敢聞第言之曰君宇度軒豁顯有聲猷由郡而臬秩非加等而奉持三尺風行部內將以詰姦慝警非常明刑辟佐教化皇祖專昇時稱外臺迨後置繡衣使者非首指矣然權猶得互察而彈壓百職奉法惟謹斯非君莫稱可云喜之無從哉

主上御極撝羅巖谷一時仗義握節之臣忠貞不二

心之士坐致通顯大者列卿次亦不失爲丞秩班
班可紀君昔以兵曹郎陞

命按薊鎮事會柄臣私憾王中丞風當傳致重典君
仰天大籲曰大丈夫即不能請上方劍寧復齷齪
效鷹犬哉卒按無驗以實上柄臣恚甚而君旋以
就養歸矣語具王君世貞疏中歸且十年即不能
備位列卿亦宜稍晉丞秩作忠直果敢之氣爲後
來法程胡起補南曹乃出守寧又僅僅量轉將不
足疑與語曰輕車熟遶蓋言習也君守寧治理章
章在人寧當倭奴衝時謹治備一行殲寇固圉練

士綏民之畧勞若繭絲猝莫可理君嘗按圖制勝
目運心惟假之事權必能折衝尊俎爲東浙長城
即從外界頃巡海缺胡不挈以歸君乃置之五嶺
外哉若宜愀然有深思者某聞之往來于懷而未
有底也曰鄙人駭不習事竊聞人臣委質君朝身
非已有升沉窮達一任所之然後可以語道昔君
之西歸也縱若鴻鵠入奉尊入驪出則勤學力農
日夕斤斤蓋不知已有十年不用將終身林壑已
矣寧復幾不可必之會如今茲哉心苟利民雖一
命亦可以濟何論巨細檜以久蓄故勁金以積鍊

故精君年甫強仕彌久彌劭循階而進黑髮可躋
釣鼎又安知前之偃蹇非後之馳驟地邪南人用
南北人用北惟巨才靡擇今北徼稱無事矣吾寧
藉

天子威靈薄海幸晏謚乃廣東島夷土寇所在充斥
潮惠幾不能支至逼會城虜守將禍釁日尋警報
載道一以爲赤子一以爲龍蛇

上方憫念東隅屢勅所司期得循良忠毅之彥持憲
運量佐時勦撫以安元元意至勤也太宰楊先生
當本兵時稔知君䟽上謂非君不可遂畀領書葆

予回視吾浙海防緩亟細鉅將如何邪要而肅者
行且驗之彼之喜固宜所稱疑與悒或可釋乎鄙
人誠駭頤君持而揚摧之君作曰微哉晰乎乃今
得聞指矣

壽司馬竹墟屠公七十序

夫所謂大臣者其道豈不重繫世教哉道也者用
以囿世非以世囿故進不徼名退不牟利範以中
正之軌底於周行則夫顯晦者時也壯耄者齒也
往有利不利者天也敦守故吾無或易慮是以其
出也任天下之重而處也天下之望歸之斯知鷹

揚之非徇俗采薇之非傲世也稱曰大老以是樹
教不旣劭乎愚竊有感於近世者之爲浮湛巧宦
與馳騖就功名者舉以官爲家罷則四出關請魚
肉其鄉之人莫之省恤夫復何言其有傲睨當世
違衆憤發抵掌握筴師心邁往則又侈然炫暴皎
皎以爲名高若不可磯比其謝事上之則遺世輕
物邈若秦越下之則深居養望覬收桑榆斯捐魏
闕之戀而貽終南之誚者蓋亦不尠是雖越於齷
齷之流槩以道之中行則未也以吾觀於竹墟屠
公非誠大臣邪公自筮仕州守至卿亞駁歷中外

踰三十年毅然以天下爲已任所在砥節平政以
寇綏氓突有聲烈更僕未暇論當嚴氏柄政時門
趨若市彼以時望屬意於公公謝絕不與通大有
謫言迄不爲動久之公業以都御史晉少司空矣
乃矯令原職撫湖南既總督湖南川貴則又改撫
南畿與時格大戾意假苗倭以泄忿卒與禍會被
逮輿論壯之賴

先帝神聖公遂東歸無復仕進念矣杜門捐俗絕口
不及前事至或引咎自艾畧無稍愠見於言面間
與三五親交締社逍遙山水間酒酣耳熱援筆賦

詩以明得意不復理人間黜陟興罷事會柄臣敗
一時罹害者交口稱快公歛神攝氣默似有指至
聞

國恤遘報深念動容隱然老臣之度誼均休戚也用
是望傾海內蒼生翹首而公務退遜若將浼焉今
年且七十矣其於世何如邪嗟乎道一也無所擇
于顯晦壯耄利不利也出以是處亦以是要在尚
於中行不愆其素故在朝廷則朝廷重在山野則
山野重名生一時範貽百世大臣者民之表亦循
是道而已覽觀天下之士若固能肩之挽浮

而還之古獨觀昭曠之原顧不重歟然公且日虎
於道道無疆年亦無疆大老之稱將企三老而後
先之七十殆造端爾某不佞幸以肺腑之親從公
後濫廁社列知公甚習故自其繫於世教者得備
論之俾後之爲大臣者視律令云

贈黎屯部序

余嘗行遊四方覽觀郡國之故沿邇徃昔則知人
代相禪道越江河流風漸靡習若成性大都崇緣
飾而背情實鶩澆競以捐禮讓上下相安不知所
底豈人情端使然哉亦御非其術而勸厲之道闕

也夫抱仁履義以身帥教用能不令而行不厲而威乃若扶良抑暴屏僞敦質用以脩職奉公維持化中由三代以來誰能廢之自非純白疆明之士將何信然行志持之無懈哉余竊有壯於念雲黎侯之佐吾郡也郡以敦朴稱俗流濡染漸離故初識治者業已慮之侯至即能提身率物精明確毅諸所措注井井奉法亦不求於法之外古稱剛而不折廉而不剋者非邪故郡中靡不嚴侯俗用是變惟恐侯一日去嗟乎茲何以哉語云桃李不言下自成蹊侯敦尚理學誦法古昔嘗遊東郭鄒先

生之門獲聞大道自歷官郎署以至臺憲雖罹讒
搆聲問日起今果用南京屯部遷矣或曰計侯功
閔委以紀綱之司社稷之役宜無不可胡區區以
屯部畀之地散而事瑣才甚給而職頗局是何異
於以豫章應樽櫨昆吾齒豚雉也殆非倫矣余曰
不然竊聞人主之用人猶醫師之用藥故治標者
後所緩拯患者先所急斯稱善理今之急非兵餉
乎擇人任事宜莫先屯部矣

高皇帝保固封圉畫地置戍令墾荒土以贍其食名
曰屯田蓋彷彿古人寓兵於農之術所稱則壤程

賦給具課牛諸政具有品式期以無曠征繇軍實
充備意深遠矣歷世久遠法寢陵夷豪滑因緣窟
宅其中而兵且粦粦靡旦夕之儲猝有徵發揭腹
戎行欲其嬰鋒敵愾能乎重以比年荐罹夷虜客
兵蠶食經費坐是大訕遂至增賦公私蓋交病之
廷議分遣重臣巡行天下冀一振刷以佐其急并獲
已也乃其禁令仍隸屯部惟強立不回者斯舉矣
昔漢代田以趙過屯湟中以充國卒成富強海內
寧一

主上英畧曠世寤寐時艱亟藉封疆之吏戰勝守固

鞭笞四夷紹迹

烈祖首事之臣非侯其孰當之夫畫一者法也神而明之者人也侯誠因此時按舉故實祛奸剔蠹與之更化俾田日益墾入日益饒士飽而嬉不復仰給縣官重滋民困較若

國初之盛劃焉一新顧不偉歟因以驅而之善敦尚禮讓移風易俗臻於大猷類非俗吏之所能爲固知侯能信然行志持之無懈也循是績愈懋則名愈隆秩愈進九德三事之選將發軔于茲侯顧不壯哉於是鵬江郡長公暨諸大夫聞余之言曰是

知侯者遂請書之以爲贈

賀柯太令人上壽序

愚嘗邇觀熙洽之代元精盪滴委輸於人哲后又復握符調律宣宅協氣邦國康乂景祚熾昌用能內有黃髮之彥外有就問之老而良士淑媛席鴻庥擅靈稟韜茂實臻遐筭者相望於時目爲人瑞斯太和之妙凝而道化之流衍也

明興餘二百載龐德駿烈燦乎光明故神祇效職陰陽委順際天蟠地靡不阜育而况人爲物靈受氣攸先宜乎宇內咸躋壽域且邇年壽星守在中女

其下人寔當之嗟乎茲亦竒矣以愚觀於柯氏何其大有冥契哉太令人春秋九十有三神情精明動履趨健家務巨細咸綜治有章歲時邑中士大夫暨親姻登堂上壽交口稱慶今冢嗣碧沚君年亦七十七月十八日爲懸弧之日爰率弟子孫曾輦百拜稱觴以謝劬勞恩士大夫暨親姻又因碧沚君賀太令人一時頌嘆以爲盛事斯非生際昌時涵育太和者邪雖然安可以不務脩哉時者幹於天者也脩者効於人者也柯世以行誼聞太令人性嚴重教家惟孝友儉勤外內無敢隕越里中

以禮佛會爲請卒不應第曰余聞之先人婦不踰
闕儒不佞佛不當若是邪顧好振人之急即捐所
服御不恤碧沚君祇奉太令人訓著聲黌校已乃
棄去朝夕侍奉惟謹暇則業九流百氏之書以多
能聞而尤督教其子茂夏遂膺鄉薦漸顯融美君
顧恭慎謙溫視初益虔未嘗失色失行於人以故
邑中人士稱長厚君子必先柯君曰斯誠太令人
子已觀是則知澡身浴德以砥行也張維肅坊以
遠慝也茹辛肩勞以養福也凝神誌志以定命也
太令人與碧沚君

而會逢其奇蓋天毓

之人葆之植茂源達柯氏之享有篤祐而世爲人
瑞不將預占哉於是李子王子陳子輩以年家屬
愚以文愚視太令人爲父姑碧沚君中表兄弟也
睹其行履甚熟故得推論之云

壽大司馬東沙張公七十序

世之所稱壽者將專於年齒乎抑有越於年齒之
外乎夫專以年齒也則鮐背黃耆者皆可囊括天
壤陶埴今古胡然聖訓嗤其無聞良士懼以耄及
敏丘絳縣之老至不能舉姓而籤鏗僅以名聞斯
知樗櫟不以鉅質襲美騏驥不以窘步貶能華實

陳而醜好判也傳不云乎太上有立德其次立功其次立言是之謂不朽何則命尸於天者名樹於人者也惟天尸命故衆庶得以馮生惟人樹名故聖賢不遑暇逸不朽之謂壽亦惟聲跡表見宇內榮光流於不替而已若吾尚書東沙張公斯其人邪公靈稟玄詣生即夙成用能應運鵬騫弱冠登朝粹德偉度嶽峙淵渟而尤嫺當世之務淬勵功能如劒發矢激識者業以公輔期之筮仕南禮曹時方興飭禮文之事公下上千載駁正同異舉可施行而尤交湛甘泉呂涇野諸公潛心理學與

孔氏之旨大相發明比晉江西學憲崇正刻僞不
少假貸雖值構讒跲而復奮周流藩臬至中丞少
司馬留都大司馬政績輻輳總之飭官常究民瘼
淑教化精法理視時所利病而興罷之遂因而不
改曰張公規式云白草番當蜀西徼稔禍十餘載
莫敢問公至即料兵遴將指搜方畧不數月盪平
全蜀底定會俺俗犯圻甸用言者薦署篆本兵經
畧邊務發謀設間雷動若神虜遂遠遁不敢南窺
公之功也逆鸞方握兵柄禍存肘腋公百方裁遏
而且理商中丞之寃幾陷不測鸞竟用斲屍神器

以安素不比於嚴氏既服闋晉秩留都世蕃掠爲
已美要重謝不應遂坐他事矯令致仕公處之怡
如無怨言忿色歸即脩社徜徉泉石稱觴哦詩曰
吾道若是也至其綜覽六經子史含精咀華九流
二氏之書亦皆探其突奧發爲文詞洪深奧衍成
一家言楊脩撰慎王諭德惟禎傲睨一世鮮所許
可獨心伏公曰命世才也居嘗方毅嚴整而中實
寬平至臨事決疑神閒氣定若不見其營思具協
機宜性尤孝友施及親族友朋喪塋婚嫁往往周
給不以訖生存亡易慮每聞國事邊警憂念深至

郡中民隱纒纒陳於所司語不及私蓋自束髮以
迨今茲較若一日是其志行通神明勲勩扶社稷
文章幹元化效衆美而萃之身令問廣譽信今傳
後如公者不既希邁哉今年七十矣九月二十四
日寔惟誕辰神慮精朗矯若游龍天相人協慶聲
載道而乃歛身却慮遜避諸鄉意彌深遠矣雖然
古者養老乞言饋漿醕爵若耆年碩彥尊爲三老
五更廣厲世教典章具在

聖天子握符御寓寤寐求舊公當應

詔而起發抒鴻學抗顏坐論光濟中興因之益冀

國祚綏丞黎崇德茂伐申衍無疆顧不侔與此中外
所爲引領也某無所比數幸從公後獲師承因楊
黃諸君畧陳不朽者如此將使榮進視之以端其
趨隱約聞之以抗其節于今乃知公之壽信非世
之所謂壽也

贈少傅南渠李年丈壽序

范某曰世所稱良弼策勲樹名多歷年所雖由天
畀蓋亦有順成默脩之道焉夫大化黜醜品物流
形協之則爲埏埴離之則若夢幻天曷故也時丁
草昧及中更屯否則必有聖哲之主名世之英相

與締構鴻業光濟中興景赴嚮應較若神設殆上天陰隲元元期於宣播太和弘濟六合非偶然已故呂公望八十起渭濱歷佐文武以鷹揚黜殷定周畢公弼亮四世再任保釐計其時蓋皆不下百年勲茂輝映寓內聲施被於後世故曰天壽平格自昔記之矣然呂公望提身淑慮敬怠義欲之介凜不敢踰畢公懋德克勤小物正色法言久而靡斁斯其所以綏養性靈寶合太和順成默脩有自來者以吾觀於少傅渠翁李公斯其品流與公少負神奇出際隆熙之運英俊颺興計日程效公且

天一方集 卷之二
廻翔翰苑垂二十年會輔臣缺衆望咸屬公公時
守司成闔門却掃

上廉知乃特召入閣視事

上方寤寐三五銳志中興密咨顯圖宵旦蓋靡有閒
也所謂神聖其臣莫及而同事者以子故或異慮
時以爲難公妙契玄微洞晰名理劑量古今之宜
叅合天人之蹟開心訂議退焉若無用是

上眷彌隆而同事者亦無所忌至北虜南倭警報旁
午悻藩逆帥恣睢橫行公且從容條畫以次翦却
蓋不動聲色而置

宗社於磐石之安蒼生樂業裔夷嚮風自世人觀之
將謂畢智殫力繼以內艱宜不啻勞矣乃年逾六
十而神慮精強若少壯然夫固天之所篤畀也公
亦德性夷粹渾然天成遇人無貴賤疎戚咸得其
懽心雖臨紛沓當觸忤應之冲裕未嘗有疾言遽
色尤喜推獎後進保全善類時稱休休有容得大
臣體者莫公先焉而公尤凝神定慮與元化游在
廟堂則安廟堂在丘林則安丘林不以物遷不以
俗撓斯非敬義懋德之遺度邪然則公之所以自
壽者壽於道矣中外多事

上眷念舊輔行當召公其視呂畢二公之期尚遠且將左右密勿一德一心俾

聖治彌弘聖筭彌昌我

國家有無疆之慶公亦有無疆之聞獨壽已乎茲六月朔值公初度寧郡倅方君蕓公通家也託以贈言其發解釋褐皆以次第從公後荷誼且甚篤故不敢辭而稍爲叙次爾

方文襄公遺稿序

嘉靖壬辰余釋褐從朝紳後獲睹方文襄公以太宰徵至自嶺南陞見稱辭琅琅而中丞苑洛韓公

亦在徵中衆相顧動色曰

主上寤寐中興延進雋異蓋丞丞焉銳也二公以道學名乃今應召並臻宜茂有顯樹邁前聞已而公晉啟學司佐理焉初公解銓務養病西樵山中潛心大道垂十年所寧復幾不可必之遇哉會奉

詔起尊崇議方興公稱引古昔傳經義疏剔群疑大典迄蒙成公遂駸駸嚮用矣當是時故老罷去柄政者或黨同伐異覬脩故憾擅能名公第休休營護畧去牽比與余鄉宗伯致齋黃先生同指道與大獄以去就諍善類免於齒劍天下共壯之居嘗

擯棄俗學誦法皇王期以翼主德裨至治即曷司
所効密謨顯畫靡不當上心衆方延頸而公復謝
病南歸溘焉長逝矣嗟乎豈天未欲康乂斯世邪
何奪公之遽也余嘗考求文藝稍獲公禮儀皇極
諸䟽心彌嚮往之乃今令子郡丞君華檢括遺篇
問序於余因得卒業焉夫構名馬者市駿骨不悵
千金愴怳而適莽蒼之野得似人者喜何者神理
融則曠世合軌情境睽雖覲面不相能其道固爾
矣公用醇儒起家致位崇顯德誼勲業燦乎光明
所著易說學解諸編精詣天人藉令罕

海內規治方來况復根心成章恢弘至道若斯之
盛焉嶺南故稱多賢陳白沙先生以道學鳴丘文
莊公勲伐表見熙代若公者謂兼之非邪第聞時
方病學士徒售口耳獵世資不且虛恢無當其嫻
當世之務又以遠遼道術蒙譏即竒文奧義殆同
虛車公固嘗以爲慮也讀公編者尚以此意求之
衆所稱雋異邁前聞茲益諗云

贈郡理趙侯應召序

聖天子握符御宇寤寐中興期得純白毅敏之士布
列臺諫用以培化原定國是糾官邪而紓民隱也

爰下所司博求可應是選者歲爲勸駕庚午三月吏部以外僚名上蓋十五人而吾寧司理趙君首被徵郡僚王長公暨楊徐諸君屬某爲贈言某曰嘻官才者廟謨采風者口碑獨不聞諸人之言乎予何言夫吾寧黃圖之僻郡而瀕海之下壤也積苦倭備歲復荐災流亡相禪構訐蜩興所望上人之拯不啻倒懸已乃百姓聞君之徵也相顧愕嘆曰胡奪我君之遽邪君嘗恤我困平我訟視邑而賦我簡受委而稽我慎保有天年室家完聚者緊誰之賜乃今棄我去邪於是涕洟徬徨若無以

生詩曰樂只君子民之父母其君之謂乎聞之吏人曰君敏達察見銖兩之奸精於法比若漢廷老吏手莫可上下顧以深刻爲耻暇即杜門研考故典布袍糲食神間意適居然有羔羊之風詩曰有斐君子如金如錫如圭如璧其君之謂乎聞之士大夫曰君性度淵懿外和內方未嘗失色失言於人而飭紀振俗萬夫不能奪其守四時無以喻其信蓋心口一律而終始不惑也詩曰柔亦不茹剛亦不吐其君之謂乎聞之下屬曰君以儒飾吏德義可師動止足法不以賢智先人然權度精審良

者揚之不能者誨之衆職故烝烝感奮詩曰有覺德行四國順之其君之謂乎若此者固紳綏之公論草野之輿頌也公等乃復見屬嗟乎桃李不言下自成蹊予方傾服之夫復何言雖然

上之所以徵君者臺諫也君之所以自獻者亦臺諫也君將脩明夙學鑒觀世道所稱端化原定國是糾官邪而紓民隱者正色竝議見諸施行俾觀者神聳聞者膽落詩曰彼己之子邦之司直予於是有望焉用能芳問宏暢簡寄日隆晉之則卿丞撫辰熙績又晉之則政府左右啓沃俾我隆慶之治

信然中興光于

烈祖志而企之猶力而赴之蓋造端於此矣詩曰秉國之均四方是維天子是毗予于是有深望焉若夫諸人之所爲言者情也私之一方也予之所爲望者義也公之天下也情不侔義故私不敵公公等之意其在斯乎其在斯乎予安能終已於言詩曰心乎愛矣遐不謂矣

壽王太孺人七十序

見菴王君之令吾邑也奉太孺人以行歲之三月十有五日太孺人初度年且七十矣見菴君晨起

肅容陳席稱觴上壽太孺人蓋沾沾色喜焉邑之
人士聞之曰太孺人固宜壽哉吾邑荐罹倭寇瘡
痍未起重以天乙之青年弗順成令君至撫救勤
懋漸可生生斯知有令君乃有吾邑也令君廉公
肅毅政先子惠諒由家範端嚴化若性成斯又知
有太孺人乃有令君也驪聲載道望門稱祝風動
達四境矣於是慈邑吳君奉邑高君定邑馬君象
邑徐君以文見屬曰子亦知壽太孺人乎吾黨幸
以職事締交於見菴君不啻兄弟也習聞太孺人
性履嘗嘆服之太孺人故汪氏著姓蚤以賢淑聞

失怙恃是時養菴王公兼已配太孺人吳矣已乃
求太孺人爲助性仁孝恭順退然謙讓無較量心
日理諸務巨細惟謹姑暨舅並敬愛之吳沒太孺
人專家政者三十餘年養菴公得以出入夷游無
內顧慮太孺人之功也養菴公即世諸子且幼太
孺人督勵彌勤用能伯商季儒而見菴君以閎學
遂起家進士追之官太孺人曰吾朝夕誨汝良苦
冀成先大夫之志乃今見汝若斯矣吾聞之受若
直者毋怠若事汝惟循法脩職惠養元无豈惟報
主亦先大夫之慶也見菴君跪而受教喜聲聞於鬼

菴君者其辭亦可已邪予曰若此可以壽矣夫壽
者格於天助於人協於內隱見而順成者也古稱
婦不踰閭無非無儀殆常道爾由今觀之人士之
領援外而邀諸內者也慙而鮮諛諸君之稱探隱
而形諸見者也詳而有徵天遺無親惟賢是篤循
是將踰堦望頤底於無筭膺隆封荷百祿日睹見
菴君躋於崇顯樹勲揚名所謂格於天助於人協
於內隱見者而順成者也信可以壽矣吳君等相
謂曰是能達所謂授簡者遂書之以往

天一閣卷之二十